

**Tarnimikkut nappaatilinnik kiffaanngissusiiaaneq allatigullu pinngitsaaliissummik iliuseqarneq pillugu Inatsisartut Inatsisaata allanngortinnera pillugu Inatsisartut inatsisaat nr. xx, xx. xxx 2015-imeersoq.**

(Peqqissutsimut Naalakkersuisoq, Martha Lund Olsen)

**Akissuteqaat**

(Peqqissutsimut aamma Ilaqutariinnermut, Naligiissitaanermut Isumaginninnermullu Naalakkersuisoq)

**Aappassaaneerineq**

Aallarniutit Naalakkersuisut sinnerlugit Ilaqutariinnermut Peqqissutsimullu Ataatsimiititaliaq isumaliutissiissut saqqummiunneqartoq pillugu qutsavigaara.

Ataatsimiititaliap tamakkiisup inatsisissatut siunnersuummut isumaqataanera Naalakkersuisut tusaatissatut tiguaat.

Siullermeerlugu oqaluuserineqarnerani tarnimikkut nappaatillit atugaat nalinginnaasumik oqaluuserineqarput. Ataatsimiititaliap sulinermi Inatsisartuni siunnersuutip oqaluuserineqarnerani siunnersuutaasut ilannguppai.

Taamaalilluni 2010-mi tarnimikkut nappaatillit sullinneqarnerat pillugu nassuiaammi 2012-imilu killiffimmik naliliinermi innersuussutaasunik atuutilersitsinermik ataatsimut ersersitsisumik, 2016-imi imal. kingusinnerpaamik 2017-imi nutaamik killiffik pillugu nalunaarusiortoqarnissaa Ilaqutariinnermut Peqqissutsimullu Ataatsimiititaliap inassutigaa.

Pilersaarut 2013-imiit 2017-imut atuuppoq, 2018-imilu tarnimikkut nappaatilinnik sullissinnermut atatillugu sulianik nangitsinissamut toqqammavissamik naliliinissaq pilersaarutaalluni.

Innarluutilinnut isumaqatigiissummi Kalaallit Nunaanni atuuttumi sivisuumik tarnikkut piginnaanikillisimasut ilaanerat, Ataatsimiititaliap isumaliutissiissummini maluginiaqquaa.

Innarluutillit pillugit isumaqatigiissutip atuutilersinneqarnissaa pillugu iliussissatut pilersaarutip naammassineqarnissaata tamanullu saqqummiunneqarnissaata qaqugu pisussatut naatsorsuutigineqarnera pillugu Naalakkersuisut ersarissumik nalunaarnissaat Ataatsimiititaliap kissaatigaa.

Tamatumani FN-ip innarluutillit pillugit ataatsimiititaliaata Qallunaat Nunaata nalunaarusiaanut siullermut naliliinermullu atatillugu inerniliinermi inassuteqaataasut naapertorlugit, Naalakkersuisut UPA 2016-imi innarluutillit pillugit nalunaarusiamik saqqummiussinissaq pilersaarutigaat.

Tamatuma saniatigut annertuumik innarluutillit ikiorserneqartarnerat pillugu inatsisissatut siunnersuummik nutaamik FN-ip innarluutillit pillugit isumaqatigiissutaani aalajangersakkanik eqqutitsisumik imalimmik, UPA 2017-imi saqqummiussinissaq Naalakkersuisut pilersaarutigaat.

Taama oqaaseqarlunga Naalakkersuisut sinnerlugit siunnersuutip saqqummiunneqartup pingajussaaneerlugu oqaluuserineqarnissaa innersuussutigaara.